

2-1474/24
07-02-2024

საქართველოს პარლამენტის ბიუროს
ასლი: საორგანიზაციო დეპარტამენტს

აგრარულ საკითხთა კომიტეტის დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში წარმოდგენილი საქართველოს მთავრობის შემადგენლობა და თანდართული სამთავრობო პროგრამა „ევროპული სახელმწიფოს მშენებლობისთვის“ (07/02-364; 02.02.2024) ნდობის გამოცხადების თაობაზე

საქართველოს პარლამენტის რეგლამენტის 160-ე მუხლის შესაბამისად, საქართველოს პარლამენტის აგრარულ საკითხთა კომიტეტმა 2024 წლის 6 თებერვლის სხდომაზე განიხილა საქართველოს პრემიერმინისტრობის კანდიდატის ირაკლი კობახიძის მიერ წარმოდგენილი საქართველოს მთავრობის შემადგენლობისა და სამთავრობო პროგრამის „ევროპული სახელმწიფოს მშენებლობისთვის“ (07/02-364; 02.02.2024) ნდობის გამოცხადების საკითხი.

კომიტეტი გაეცნო საქართველოს მთავრობის წევრობის კანდიდატების შესახებ მონაცემებს და მოისმინა ინფორმაცია წარმოდგენილი სამთავრობო პროგრამის თაობაზე.

კომიტეტმა, კენჭისყრაში მონაწილე წევრთა მიერ ერთხმად მიღებული გადაწყვეტილებით (სხდომას ესწრებოდა კომიტეტის 12 წევრი, კენჭისყრაში მონაწილეობა მიიღო 11-მა წევრმა, მხარი დაუჭირა 11-მა წევრმა), ნდობა გამოუცხადა საქართველოს მთავრობის შემადგენლობასა და სამთავრობო პროგრამას.

კომიტეტის თავმჯდომარე
ნინო წილოსანი

2-1531/24
08-02-2024

საქართველოს პარლამენტის ბიუროს

ასლი: საქართველოს პარლამენტის საორგანიზაციო
დეპარტამენტის უფროსს
ქალბატონ ეთერ სვიანაიძეს

დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოსაცხადებლად წარმოდგენილი საქართველოს მთავრობის შემადგენლობისა და თანდართული სამთავრობო პროგრამის „ევროპული სახელმწიფოს მშენებლობისთვის“ თაობაზე (N07-2/364; 02.02.2024)

საქართველოს პარლამენტის ადამიანის უფლებათა დაცვისა და სამოქალაქო ინტეგრაციის კომიტეტმა 2024 წლის 5 თებერვლის სხდომაზე, საქართველოს პარლამენტის რეგლამენტის 160-ე მუხლის მე-3 პუნქტის შესაბამისად, განიხილა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოსაცხადებლად წარმოდგენილი საქართველოს მთავრობის შემადგენლობისთვის ნდობის გამოცხადების საკითხი და თანდართული სამთავრობო პროგრამა „ევროპული სახელმწიფოს მშენებლობისთვის“.

კომიტეტი გაეცნო საქართველოს მთავრობის წევრობის კანდიდატების ბიოგრაფიულ ცნობებს და მოისმინა ინფორმაცია წარმოდგენილი სამთავრობო პროგრამის მიზნებისა და ძირითადი მიმართულებების თაობაზე.

აღნიშნული სამთავრობო პროგრამის ძირითადი მიზნებია ეკონომიკის მეტად სტიმულირება, თითოეული მოქალაქისათვის სტაბილური და უსაფრთხო გარემოს

შენარჩუნება, დემოკრატიული ინსტიტუციების გაძლიერება და საქართველოს ევროკავშირში გაწევრიანებისთვის საჭირო ქმედითი ნაბიჯების გადადგმა.

სამთავრობო გეგმაში, გარდა იმისა, რომ ყველა სექტორული მიმართულების პრიორიტეტების განსაზღვრისას გათვალისწინებულია ადამიანის უფლებების ასპექტი, ასევე, ადამიანის უფლებებს ცალკე თავი ეთმობა. აღნიშნული იმსახურებს დაფასებას, რამეთუ ადასტურებს სამთავრობო პროგრამაში ადამიანის ფუნდამენტური უფლებების საკითხების პრიორიტეტიზაციის მაღალ ხარისხს.

შესაბამისად, საქართველოს მთავრობის ძალისხმევა მიმართული იქნება შემდეგ საკვანძო სფეროებზე:

1. საგარეო პოლიტიკა, ევროკავშირში ინტეგრაციის შეუქცევადობა, რუსეთ-საქართველოს კონფლიქტის მშვიდობიანი მოგვარება, უსაფრთხოების და ქვეყნის სტაბილური განვითარების უზრუნველყოფა; საზოგადოებრივი უსაფრთხოება;
2. ეკონომიკური განვითარება;
3. სოციალური პოლიტიკისა და ადამიანური კაპიტალის განვითარება;
4. სახელმწიფო მმართველობა.

1. საგარეო პოლიტიკა, ევროკავშირში ინტეგრაციის შეუქცევადობა, რუსეთ-საქართველოს კონფლიქტის მშვიდობიანი მოგვარება, უსაფრთხოების და ქვეყნის სტაბილური განვითარების უზრუნველყოფა; საზოგადოებრივი უსაფრთხოება

სახელმწიფოს მთავარ ამოცანად რჩება საქართველოს ევროკავშირსა და ევრო-ატლანტიკურ სტრუქტურებში გაწევრიანება, ქვეყნის ტერიტორიული მთლიანობის მშვიდობიანი გზით აღდგენა, დეოკუპაცია, საქართველოს რეგიონული და გლობალური როლის კიდევ უფრო განმტკიცება ქვეყნის შემდგომი სწრაფი განვითარების უზრუნველყოფის მიზნით.

უსაფრთხოების გარემოს მზარდი გამოწვევებიდან გამომდინარე, მთავრობის მიზანია, ტოტალური თავდაცვის მიდგომაზე დაფუძნებით, ქვეყნის თავდაცვისუნარიანობისა და სტრატეგიული მზადყოფნის დონის ამაღლება, ასევე, დანაშაულთან ბრძოლის გაძლიერება, ადამიანის უფლებათა მაღალი სტანდარტით დაცვა და უსაფრთხო გარემოს უზრუნველყოფა. შედეგად, მთავრობა შეძლებს მოსახლეობისთვის მშვიდი და სტაბილური გარემოს შექმნას.

სამთავრობო პროგრამა „ევროპული სახელმწიფოს მშენებლობისთვის“, სხვებს შორის, ადგენს შემდეგ პრიორიტეტულ საკითხებს:

- ევროკავშირში გაწევრიანების შესახებ მოლაპარაკებების გახსნის მიზნით, საქართველო გააგრძელებს მუშაობას ევროკავშირის ინსტიტუციებთან და წევრ ქვეყნებთან;
- აქტიურად გაგრძელება ასოცირების შეთანხმების ეფექტიანი განხორციელება და მასთან დაკავშირებული შესაძლებლობების გამოყენება, ღრმა და ყოვლისმომცველი თავისუფალი ვაჭრობის სივრცის კომპონენტის ჩათვლით;
- გაგრძელება აქტიური მუშაობა აღმოსავლეთ პარტნიორობის ეკონომიკური და საინვესტიციო გეგმით გათვალისწინებული საფლაგმანო ინიციატივების რეალიზაციის მიზნით;
- გაგრძელება ევროკავშირთან უსაფრთხოებისა და თავდაცვის სფეროში აქტიური თანამშრომლობა, მათ შორის, ევროკავშირის სტრატეგიული კომპასით გათვალისწინებული პრიორიტეტების მიმართულებით, რომელიც სხვა მიმართულებებთან ერთად, ხაზს უსვამს შავ ზღვაზე საზღვაო უსაფრთხოების მნიშვნელობას;
- ქვეყნის ევროპული ინტეგრაციის პარალელურად, საქართველოს უპირველეს მიზნად რჩება საქართველოს ტერიტორიული მთლიანობის მშვიდობიანი გზით აღდგენა და ქვეყნის სუვერენიტეტის განმტკიცება;
- განსაკუთრებული ყურადღება დაეთმობა ოკუპირებულ ტერიტორიებზე უსაფრთხოებისა და ჰუმანიტარული მდგომარეობის გაუმჯობესებასა და ადამიანის უფლებათა დაცვის უზრუნველსაყოფად საერთაშორისო ძალისხმევის კონსოლიდაციას, ასევე, მოლაპარაკებების ფორმატების ეფექტიან გამოყენებას;
- მნიშვნელოვან ამოცანად რჩება ოკუპირებული ტერიტორიების არაღიარების პოლიტიკის კონსოლიდაცია;
- გაგრძელება საქართველოს მთავრობის სამშვიდობო ინიციატივის – „ნაბიჯი უკეთესი მომავლისკენ“ - განხორციელება;
- ქვეყნის მთავარ სტრატეგიულ პარტნიორთან – აშშ-სთან სტრატეგიული თანამშრომლობის შემდგომი გაღრმავების უზრუნველყოფის მიზნით, ინტენსიური მუშაობა გაგრძელება, მათ შორის, ისეთი პრიორიტეტული მიმართულებებით, როგორცაა: თავდაცვა და უსაფრთხოება, ევროპული და ევრო-

ატლანტიკური ინტეგრაცია, კონფლიქტის მშვიდობიანი დარეგულირება, სავაჭრო-ეკონომიკური კავშირების განმტკიცება, საქართველოს ეკონომიკური განვითარება და დემოკრატიული ინსტიტუტების შემდგომი კონსოლიდაცია;

- განსაკუთრებული ყურადღება დაეთმობა ჩინეთთან სტრატეგიული თანამშრომლობის დეკლარაციის ფარგლებში ურთიერთობების განვითარებას დოკუმენტით განსაზღვრული ყველა პრიორიტეტული მიმართულებით;
- საქართველო განაგრძობს რეგიონში დაბალანსებული და ურთიერთსასარგებლო პარტნიორულ თანამშრომლობაზე დამყარებული პოლიტიკის გატარებას და ამ გზით, საკუთარი მნიშვნელოვანი წვლილის შეტანას რეგიონის მდგრადი და სტაბილური განვითარების პროცესში;
- გაღრმავდება თანამშრომლობა როგორც ნატოსა და ევროკავშირის წევრებთან, ასევე, შავი ზღვის რეგიონისა და სხვა პარტნიორ ქვეყნებთან;
- გაგრძელდება კრიმინალური პოლიციის, სასაზღვრო პოლიციისა და საპატრულო პოლიციის რეფორმა, საგამოძიებო კომპონენტის გაძლიერება და გამოძიების ხარისხის გაზრდა, ანალიზზე დაფუძნებული საპოლიციო საქმიანობის მოდელის განვითარება, თანამშრომლობა საერთაშორისო საპოლიციო სტრუქტურებთან;
- პრიორიტეტულ მიმართულებად რჩება პენიტენციური სისტემის განვითარება და საერთაშორისო სტანდარტებთან შესაბამისობის უზრუნველყოფა. ამ მიზნით გაგრძელდება პენიტენციური სისტემის ინფრასტრუქტურის საერთაშორისო სტანდარტებთან მაქსიმალური მიახლოება;
- სახელმწიფო უწყებების, სამოქალაქო სექტორის და ადგილობრივი ხელისუფლების სრული ჩართულობით განხორციელდება ადამიანის უფლებათა დაცვის სამოქმედო გეგმა, რომელიც განსაზღვრავს მთავრობის გრძელვადიან პრიორიტეტებს ადამიანის უფლებათა დაცვის სფეროში.

2. ეკონომიკური განვითარება

ეკონომიკური პოლიტიკის უმთავრესი ამოცანებია - მაკროეკონომიკური სტაბილურობის შენარჩუნება და საინვესტიციო გარემოს შემდგომი გაუმჯობესება; ეკონომიკურ შესაძლებლობებისა და საბაზისო სერვისებზე ხელმისაწვდომობის ზრდა; საშუალოვადიან პერიოდში ქვეყნის ეკონომიკის ევროკავშირის წევრობისთვის მომზადება; ეკონომიკის სწრაფი ზრდა, ევროკავშირთან ეკონომიკური და პოლიტიკური ურთიერთობების გაღრმავება, სიღარიბის შემცირება და ქვეყნის რეგიონულ

ლოგისტიკურ და საინვესტიციო ჰაბად ჩამოყალიბა; გონივრული და თანმიმდევრული მაკროეკონომიკური პოლიტიკის გაგრძელება და სტრუქტურული ეკონომიკური რეფორმების გატარება; უმუშევრობის დაბალი დონის უზრუნველყოფილი დონის ძიებების ხელშეწყობა, რასაც შედეგად მოჰყვება უკიდურესი სიღარიბის აღმოფხვრა და სიღარიბის დაბალი დონის მიღწევა; ბიუჯეტის გამჭვირვალობის მიმართულებით მუშაობის გაგრძელება.

ზემოთ ხსენებული ამოცანების შესასრულებლად ქმედითი ნაბიჯები გადაიდგმება შემდეგი მიმართულებებით: სწრაფი ეკონომიკური განვითარება; დასაქმება; სამეწარმეო და საინვესტიციო გარემოს და კერძო სექტორის კონკურენტუნარიანობის გაუმჯობესება; ეკონომიკური შესაძლებლობების ეფექტიანი გამოყენება და სატრანზიტო ჰაბის პოტენციალის ათვისება; ენერგეტიკის განვითარება და ენერგოუსაფრთხოების ხელშეწყობა; ტრანსპორტი და ლოგისტიკა; კავშირგაბმულობა და საინფორმაციო ტექნოლოგიები; ტურიზმის განვითარება; ინფრასტრუქტურის განვითარება; რეგიონული განვითარება; სოფლის და სოფლის მეურნეობის განვითარება; გარემოს დაცვა.

3. სოციალური პოლიტიკისა და ადამიანური კაპიტალის განვითარება

მოცემული მიმართულებით მთავრობის მიზანია მოსახლეობის ჯანმრთელობის მდგომარეობის გაუმჯობესება და ჯანდაცვის ხარისხიან სერვისებზე უნივერსალური ხელმისაწვდომობის უზრუნველყოფა. მთავრობის მტკიცე პოლიტიკაა ქვეყანაში სოციალური დაცვის სისტემის გაძლიერება და დასაქმების ხელშეწყობა. ამასთანავე, პრიორიტეტად რჩება ხარისხიანი განათლების სისტემის განვითარება, მეცნიერების, ტექნოლოგიებისა და ინოვაციების მხარდაჭერა, რაც კიდევ უფრო ძლიერი და ცოდნით აღჭურვილი საზოგადოების ჩამოყალიბებას შეუწყობს ხელს.

ზემოთქმულის განსახორციელებლად:

- მთავრობის სამოქმედო გეგმის ერთი-ერთი მთავარი მიმართულება იქნება მოქალაქეზე ორიენტირებული და სოციალური სამართლიანობის პრინციპზე დაფუძნებული ჯანმრთელობის დაცვის სისტემის შენარჩუნება და შემდგომი გაძლიერება;
- საყოველთაო ჯანდაცვის პროგრამით კვლავ უზრუნველყოფილი იქნება საქართველოს მოქალაქეებისთვის სამედიცინო მომსახურებით უნივერსალური მოცვა;

- განსაკუთრებული ყურადღება დაეთმობა პირველადი ჯანდაცვის სისტემის გაძლიერებას;
- განხორციელდება საქართველოს ფსიქიკური ჯანმრთელობის ეროვნული სტრატეგიის ამოცანები;
- მთავრობა გააგრძელებს მიზნობრივი ჯგუფების, მათ შორის ხანდაზმულების, შეზღუდული შესაძლებლობის მქონე პირების, ბავშვების სოციალური დაცვის პროგრამებით უზრუნველყოფას, სამართლიანი, გამჭვირვალე და ეფექტიანი სოციალური დაცვის სისტემით სიღარიბესთან დაკავშირებული რისკების შემცირების ხელშეწყობას;
- საქართველოს მთავრობის ერთ-ერთი უმნიშვნელოვანესი პრიორიტეტია განათლებაზე საყოველთაო ხელმისაწვდომობის უზრუნველყოფა და მისი ხარისხის ზრდა, რაც მოიცავს ადრეული და სკოლამდელი განათლების, ზოგადი განათლების, პროფესიული განათლებისა და უმაღლესი განათლების მიმართულებებს;
- გაგრძელდება ინტენსიური მუშაობა ევროკავშირთან სექტორული ინტეგრაციის მიზნით, განათლების, მეცნიერების, კვლევისა და ახალგაზრდობის მიმართულებებით.

4. სახელმწიფო მმართველობა

მთავრობის უცვლელ პრიორიტეტად რჩება დემოკრატიული ინსტიტუტების მშენებლობა და საჯარო სამსახურის სისტემის განვითარება, რაც ასევე უზრუნველყოფს საქართველოს ევროკავშირში სრულფასოვანი ინტეგრაციის დაჩქარებას. მთავრობა უწყვეტად განაგრძობს მოქალაქეებისთვის სერვისების კიდევ უფრო მაღალი სტანდარტით მიწოდებასა და რეალურ საჭიროებებსა და მტკიცებულებებზე დაფუძნებული პოლიტიკის განხორციელებას.

კარგი მმართველობის უზრუნველსაყოფად:

- გაგრძელდება საჯარო სექტორის ინსტიტუციური შესაძლებლობების განვითარება;
- შემუშავდება საჯარო სამსახურის განვითარების სტრატეგია;
- მთავრობა ხელს შეუწყობს მის ხელთ არსებული ანტიკორუფციული მექანიზმების კიდევ უფრო გაძლიერებასა და ეფექტიან საქმიანობას;

- გაგრძელდება მუშაობა სახელმწიფო სტრუქტურებში ანგარიშვალდებულების სისტემების ეფექტიანად დანერგვის მიმართულებით;
- ქვეყანაში სახელმწიფო სერვისების გაუმჯობესების მიზნით, გაგრძელდება „სახელმწიფო სერვისების განვითარების 2022-2025 წლების სტრატეგიით“ განსაზღვრული სერვისების შექმნის, მიწოდების, ხარისხის უზრუნველყოფისა და განფასების ერთიანი მიდგომებისა და პრინციპების დანერგვა, რაც ხელს შეუწყობს, ასევე, ელექტრონული მმართველობის განვითარებას;
- მთავრობის პრიორიტეტად რჩება კრიტიკული ინფრასტრუქტურის უსაფრთხოების გაძლიერება და ელექტრონული მმართველობის განვითარება, რაც, ასევე, მოიცავს ელექტრონული სერვისების ხელმისაწვდომობის ზრდას;
- დისტანციური სერვისების განვითარების მიზნით, შემუშავდება ეროვნული არქივის მკვლევართა მომსახურების ელექტრონული პროგრამა და ახალი კატალოგები;
- გაგრძელდება „იუსტიციის სახლების“ მასშტაბური მშენებლობა;
- საქართველოს მთავრობის პრიორიტეტი იქნება დეცენტრალიზაციის დამტკიცებული პოლიტიკის წარმატებით განხორციელება.

კომიტეტის შეფასება

კომიტეტმა აღნიშნა, რომ წარმოდგენილი სამთავრობო პროგრამა ქმნის მყარ საფუძვლებს მომდევნო წლებში ქვეყნის სწრაფი განვითარებისთვის, როგორც ეროვნული, ასევე, რეგიონული და გლობალური მასშტაბით, გვაახლოებს ევროკავშირში გაწევრიანების ისტორიულ მიზანთან და ემსახურება თითოეული მოქალაქის მდგომარეობის გაუმჯობესებას საზოგადოებრივი ცხოვრების მრავალ სფეროში.

კომიტეტი მიესალმება, რომ წარმოდგენილი სამთავრობო გეგმა დაგეგმილი ღონისძიებებისა და რეფორმების განხორციელების პროცესში ცნობს და იცავს ადამიანის ფუნდამენტურ უფლებებს. ადამიანის უფლებებზე დაფუძნებული მიდგომების პრიორიტეტიზაცია დასტურდება, როგორც სამთავრობო გეგმის ანალიზიდან, ასევე, ცალკეული საკითხების ირგვლივ მთავრობის წევრობის კანდიდატთა მოხსენებებიდან და განმარტებებიდან.

სამთავრობო გეგმის თანახმად, „თავისუფალი, უსაფრთხო და ეკონომიკურად ძლიერი ქართული სახელმწიფოს მშენებლობა დემოკრატიული ღირებულებების

სისტემას ეფუძნება, სადაც მთავარი მიზანი თითოეული მოქალაქის კეთილდღეობაა“. აღნიშნული მიდგომა ადასტურებს, რომ ნებისმიერი მიმართულებით რეფორმების განხორციელება არ არის თვითმიზნური და ემსახურება მოქალაქეთა რეალური კეთილდღეობის უზრუნველყოფას.

კომიტეტი აღნიშნავს, რომ მთავრობის წევრობის კანდიდატები, მათი კომპეტენციის, გამოცდილებისა და ხედვების გათვალისწინებით, შეძლებენ უზრუნველყონ სამთავრობო გეგმით გაცხადებული მიზნებისა და ამოცანების სათანადო აღსრულება. გარდა ამისა, კომიტეტი ადასტურებს სამთავრობო პროგრამის - „ევროპული სახელმწიფოს მშენებლობისთვის“, აღსრულების პროცესში მთავრობისა და პარლამენტის მჭიდრო თანამშრომლობისა და ურთიერთდახმარების აუცილებლობას, ისევე როგორც ხსენებული პროგრამის იმპლემენტაციაზე სათანადო საპარლამენტო ზედამხედველობის განხორციელების მნიშვნელობას.

ამდენად, კომიტეტმა დადებითად შეაფასა საქართველოს მთავრობის წევრობის კანდიდატების ხედვები სამთავრობო პროგრამის შესაბამისად მათი პრიორიტეტების, სამომავლო გეგმებისა და გასატარებელი ღონისძიებების შესახებ.

აღნიშნულიდან გამომდინარე, კომიტეტმა მხარი დაუჭირა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისთვის წარმოდგენილ საქართველოს მთავრობის შემადგენლობასა და სამთავრობო პროგრამას „ევროპული სახელმწიფოს მშენებლობისთვის“.

პატივისცემით,

კომიტეტის თავმჯდომარე
მიხეილ სარჯველაძე

ქ. სარჯველაძე

2-1370/24
06-02-2024

საქართველოს პარლამენტის ბიუროს

საქართველოს პარლამენტის განათლების, მეცნიერებისა და ახალგაზრდულ საქმეთა
კომიტეტის
დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილ საქართველოს მთავრობის შემადგენლობასა და სამთავრობო პროგრამაზე - „ევროპული სახელმწიფოს მშენებლობისთვის“ (№07-2/364; 02.02.2024) .

საქართველოს პარლამენტის განათლების, მეცნიერებისა და ახალგაზრდულ საქმეთა კომიტეტმა 2024 წლის 5 თებერვლის სხდომაზე განიხილა ზემოაღნიშნული საკითხი.

წარმოდგენილი სამთავრობო პროგრამის მიხედვით სახელმწიფოს მდგრადი განვითარებისთვის უმნიშვნელოვანესია ხარისხიანი განათლებისა და მეცნიერების სისტემა, რომელმაც უნდა უზრუნველყოს საერთაშორისო ასპარეზზე საქართველოს როლისა და მნიშვნელობის გაძლიერება, ასევე შესაბამის სფეროებში საქართველოს მოქალაქეთა გლობალური კონკურენტუნარიანობა. განათლებაზე საყოველთაო ხელმისაწვდომობის უზრუნველყოფა და მისი ხარისხის ზრდა საქართველოს მთავრობის ერთ-ერთი უმნიშვნელოვანესი პრიორიტეტია. შესაბამისად, გაგრძელდება განათლების სისტემის ბიუჯეტის ზრდის პროცესი. განათლების რეფორმა მოითხოვს სისტემურ და თანმიმდევრულ მიდგომას, რაც გულისხმობს ადრეული და სკოლამდელი აღზრდიდან, უმაღლესი განათლებისა და მეცნიერების მიმართულებების ჩათვლით, ერთიანი სტრატეგიის არსებობას, რათა რეფორმის შედეგი იყოს მაქსიმალურად ეფექტიანი და ხელშესახები.

2024 წლიდან ახალგაზრდული პოლიტიკა განათლების სფეროს სისტემური ნაწილი გახდა, რაც უზრუნველყოფს ახალგაზრდების საჭიროებებისა და მათ ინტერესებზე მორგებული მრავალფეროვანი პროგრამების, პროექტებისა და აქტივობების განხორციელებას საერთაშორისოდ აღიარებული სტანდარტების შესაბამისად. გაგრძელდება ინტენსიური მუშაობა ევროკავშირთან სექტორული ინტეგრაციის მიზნით, განათლების, მეცნიერების, კვლევისა და ახალგაზრდობის მიმართულებებით.

ადრეული და სკოლამდელი განათლება

სკოლამდელი განათლების მიმართულებით, შენარჩუნებული იქნება მნიშვნელოვანი მონაპოვარი და საყოველთაო ხელმისაწვდომობის უზრუნველსაყოფად, საჯარო დაწესებულებებში ადრეული და სკოლამდელი განათლება კვლავაც იქნება უფასო. განხორციელდება ღონისძიებები სპეციალური საჭიროების მქონე ბავშვებზე მორგებული განათლების მომსახურების უზრუნველსაყოფად. ხარისხიან სკოლამდელ განათლებაზე ხელმისაწვდომობის გაზრდის მიზნით, გაგრძელდება დივერსიფიცირებული სკოლამდელი განათლების მოდელებზე მუშაობა, რაც გულისხმობს საჭიროებებზე მორგებული მომსახურების განვითარებას როგორც ურბანული დასახლებების მრავალრიცხოვანი ჯგუფების განტვირთვის, ისე, მაღალმთიანი რეგიონების მცირეკომლიანი და ეთნიკური უმცირესობებით დასახლებული მუნიციპალიტეტებისთვის. გაგრძელდება შესაბამისი ღონისძიებები სკოლამდელ დაწესებულებებში დასაქმებულთა შრომის ანაზღაურების გაზრდისა და მათი კვალიფიკაციის ამაღლების მიმართულებით. ასევე, ხელი შეეწყობა სკოლამდელ დაწესებულებებში ახალგაზრდა კვალიფიციური კადრების მოზიდვას. მხარდაჭერილი იქნება და სახელმწიფოს მიერ სრულად დაფინანსდება სკოლამდელი განათლების უმაღლესი საგანმანათლებლო პროგრამები.

ზოგადი განათლება

მთავრობის პრიორიტეტია კვლევასა და მტკიცებულებებზე დაფუძნებით ზოგადი განათლების ხარისხის მნიშვნელოვანი გაუმჯობესება, სისტემის განვითარება საერთაშორისო სტანდარტების შესაბამისად და ახალგაზრდა და გამოცდილი პროფესიონალების მოზიდვა. ამ მიზნით, მომდევნო წლების განმავლობაში:

- მნიშვნელოვნად გაფართოვდება სისტემის დეცენტრალიზაცია, გაიზრდება სკოლების ავტონომიურობის ხარისხი, რესურსცენტრების როლი და შეიქმნება სკოლების მხარდამჭერი ძლიერი სისტემური მექანიზმები.
- უპრეცედენტოდ გაიზარდა და მომავალშიც გაიზრდება ზოგადი განათლების საბიუჯეტო დაფინანსება; სამართლიანობის პრინციპების გათვალისწინებით, შეიცვლება მასწავლებლების სახელფასო პოლიტიკა და მნიშვნელოვნად გაიზრდება მასწავლებელთა და სკოლის ადმინისტრაციული პერსონალის შრომის ანაზღაურება.
- განახლება მასწავლებლის პროფესიის რეგულირების წესი, განხორციელდება მასწავლებელთა უწყვეტი პროფესიული განვითარების ღონისძიებები, მათი პროფესიული საჭიროებების შესაბამისად.
- შემუშავდება და დაინერგება სკოლების მართვისა და დაფინანსების დიფერენცირებული მოდელები.
- ზოგადი განათლების ხარისხის უზრუნველყოფის განახლებული სტანდარტებისა და პროცედურების მიხედვით გაგრძელდება საჯარო სკოლების ავტორიზაცია.
- გაგრძელდება ახალი, თანამედროვე მოთხოვნების შესაბამისი, მაღალ სტანდარტებზე ორიენტირებული ეროვნული სასწავლო გეგმისა და შესაბამისი სასწავლო რესურსების შექმნა და განვითარება, შემუშავდება საშუალო საფეხურის ახალი კონცეფცია; დაინერგება ფართომასშტაბიანი სასკოლო შეფასების სისტემა; გაგრძელდება ელექტრონული რესურსების განვითარება.

- გაგრძელება სახელმძღვანელოების განახლებისა და ახალი სახელმძღვანელოების შექმნის პროცესი.
- დაიწყება აკადემიური შედეგების სადიაგნოსტიკო შეფასებები, რაც გულისხმობს სკოლის ანგარიშვალდებულებას ეროვნული სასწავლო გეგმით განსაზღვრულ სწავლის შედეგებთან მიმართებით.
- დაიწყება სკოლის საშუალო საფეხურიდან უმაღლეს საგანმანათლებლო დაწესებულებებში ტრანზიციის ახალ მოდელზე მუშაობა.
- მთელი საქართველოს მასშტაბით გაგრძელდება ინკლუზიური განათლების კომპონენტების დანერგვა სსმ/შშმ პირებისთვის განათლების ხელმისაწვდომობის გაზრდისა და მათზე მორგებული სასწავლო პროცესის წარმართვისათვის.

პროფესიული განათლება

- საქართველოს მთავრობის პრიორიტეტად დარჩება პროფესიული განათლების განვითარება, როგორც შრომის ბაზარზე მოთხოვნასა და მიწოდებას შორის არსებული დისბალანსის აღმოფხვრის მნიშვნელოვანი ინსტრუმენტი. მნიშვნელოვანია პროფესიული განათლება იყოს ყველასთვის ხელმისაწვდომი და პასუხობდეს შრომის ბაზრის საჭიროებებს როგორც ადგილობრივ, ასევე საერთაშორისო დონეზე. ამ მიზნით:
 - პროფესიული განათლების მიწოდებაში ჩაერთვებიან საჯარო სკოლები და პროფესიული განათლება მეტად ხელმისაწვდომი გახდება საშუალო საფეხურის მოსწავლეებისათვის.
 - გაიზრდება სამუშაოზე დაფუძნებული და ბაზარზე მოთხოვნადი პროფესიული მომზადებისა და გადამზადების პროგრამების რაოდენობა, რის საფუძველზეც გაიზრდება პროფესიული განათლების კურსდამთავრებულთა დასაქმების მაჩვენებელი; ასევე, გაიზრდება ინტეგრირებული პროგრამების მასშტაბები.
 - მნიშვნელოვნად გაიზარდა და მომავალშიც ეტაპობრივად გაიზრდება პროფესიული განათლების საბიუჯეტო დაფინანსება და ამოქმედდება პროფესიული განათლების დაფინანსების შედეგებზე დაფუძნებული მოდელი.
 - დარგობრივი გაერთიანებებისა და კერძო სექტორის ჩართულობით გადაიხედება პროფესიული სტანდარტები და 2025 წლის ბოლომდე შემუშავდება/განახლდება ყველა პროფესიული სტანდარტი ახალი მეთოდოლოგიის შესაბამისად. შრომის ბაზრის საჭიროებების დაკმაყოფილების მიზნით დაინერგება კერძო სექტორის მონაწილეობით შემუშავებული ახალი კვალიფიკაციები.

უმაღლესი განათლება

უმაღლესი განათლების სისტემის განვითარების მიზნით, დაგეგმილია შემდეგი ღონისძიებების გატარება:

- მნიშვნელოვნად გაიზარდა და მომავალშიც ეტაპობრივად გაიზრდება უმაღლესი განათლების საბიუჯეტო დაფინანსება.
- გაგრძელდება უმაღლესი განათლების სისტემის დაფინანსების ახალ მოდელზე მუშაობა, რომელიც ხელს შეუწყობს საგანმანათლებლო დაწესებულებების მდგრად განვითარებასა და სასწავლო პროცესის სწავლის შედეგებზე ორიენტირებას.
- საქართველოში მოქმედი უმაღლესი განათლების ხარისხის უზრუნველყოფის მექანიზმები სრულ შესაბამისობაში იქნება უმაღლესი განათლების ევროპული სივრცის (ENQA) ხარისხის უზრუნველყოფის სტანდარტებსა და სახელმძღვანელო პრინციპებთან.
- შემუშავდება სამეცნიერო-კვლევითი საქმიანობისა და სადოქტორო პროგრამების შეფასების ერთიანი კონცეფცია.
- ქვეყანაში მასწავლებლის რესურსის გაძლიერების მიზნით, გაგრძელდება მასწავლებლის მომზადების საგანმანათლებლო პროგრამებზე ჩარიცხულ პირთა დაფინანსება, ამოქმედდება სპეციალური მასწავლებლის მომზადების საგანმანათლებლო პროგრამები.
- ხელმისაწვდომობის გაზრდის მიზნით, გაგრძელდება ოკუპირებულ ტერიტორიებზე და გამყოფი ხაზის მიმდებარე სოფლებში მცხოვრებ პირთა სწავლის ხელშეწყობის პროგრამები.
- განხორციელდება სპეციალური პროგრამები ეთნიკური უმცირესობების წარმომადგენელთათვის. გაგრძელდება მსჯავრდებულის მიერ ბაკალავრიატისა და მაგისტრატურის საგანმანათლებლო პროგრამაზე განათლების მიღების ხელშემწყობი ღონისძიებები.
- შემუშავდება დისტანციური განათლების მარეგულირებელი საკანონმდებლო ჩარჩო.

მეცნიერება

ყოველწლიურად, ეტაპობრივად გაიზრდება მეცნიერების სახელმწიფო დაფინანსება, მეცნიერ-თანამშრომელთა შრომის ანაზღაურება და დაინერგება შედეგებზე დაფუძნებული დაფინანსების მოდელი. დაწყებულია საინჟინრო, საბუნებისმეტყველო და ტექნოლოგიური (STEM), ასევე ჰუმანიტარული და ქართველოლოგიური სამეცნიერო საგრანტო კონკურსების დაფინანსების ზრდის პროცესი, ფართოვდება ფუნდამენტური კვლევების მასშტაბი. გაძლიერდება საზღვარგარეთ მოღვაწე ქართველი და უცხოელი აკადემიური და სამეცნიერო პერსონალის ქართულ სამეცნიერო სივრცესთან თანამშრომლობის მხარდაჭერა.

გაძლიერდება გამოყენებითი სამეცნიერო კვლევების კომერციალიზაციის პროცესი. გაგრძელდება რეფორმის განხორციელება, რომელიც ითვალისწინებს უმაღლესი განათლებისა და მეცნიერების სრულ ფუნქციურ ინტეგრაციას, მეცნიერების მართვის სისტემის დახვეწას, კვლევების დაფინანსების მოდელის სრულყოფას, სამეცნიერო კვლევითი ერთეულების რანჟირებას. სახელმწიფო განსაზღვრავს სამეცნიერო-

კვლევითი დაწესებულებებისთვის სავალდებულო მინიმალურ სტანდარტებს და იზრუნებს საქართველოში მოქმედი სამეცნიერო-კვლევითი ინსტიტუციების საქმიანობის ხარისხის გაუმჯობესებაზე.

ახალგაზრდული პოლიტიკა

სახელმწიფოს ახალგაზრდული სტრატეგიის განხორციელებისას, მნიშვნელოვანი ყურადღება დაეთმობა ახალგაზრდების აქტიურ ჩართულობას მათთვის მნიშვნელოვან საკითხებთან დაკავშირებულ გადაწყვეტილებათა მიღების პროცესში. მათ შორის, ახალგაზრდული პოლიტიკისა და პროგრამების შემუშავების, იმპლემენტაციის, მონიტორინგისა და შეფასების მიმართულებით.

ახალგაზრდებისთვის ხელმისაწვდომი გახდება საკვანძო კომპეტენციების განვითარების ხელშემწყობი ხარისხიანი არაფორმალური განათლებისა და ახალგაზრდული საქმიანობის პროგრამები, სტუდენტური ფესტივალები, საბანაკე, მოხალისეობრივი, საინფორმაციო და საკონსულტაციო სერვისები, საგრანტო პროექტები. გაფართოვდება საერთაშორისო თანამშრომლობა ახალგაზრდული პოლიტიკისა და ახალგაზრდული საქმიანობის მიმართულებით.

კომიტეტი დადებითად აფასებს წარმოდგენილ სამთავრობო პროგრამას და მთავრობის შემადგენლობას.

კომიტეტმა მხარი დაუჭირა საქართველოს პრემიერმინისტრობის კანდიდატის ირაკლი კობახიძის მიერ წარმოდგენილ სამთავრობო პროგრამას და საქართველოს მთავრობის შემადგენლობისათვის ნდობის გამოცხადებას.

პატივისცემით,

კომიტეტის თავმჯდომარე
გივი მიქანაძე



2-1469/24
07-02-2024

საქართველოს პარლამენტის ბიუროს

ასლი: საქართველოს პარლამენტის საორგანიზაციო
დეპარტამენტის უფროსს,
ქალბატონ ეთერ სვიანაიძეს

გარემოს დაცვისა და ბუნებრივი რესურსების კომიტეტის

დასკვნა

საქართველოს პრემიერმინისტრობის კანდიდატის მიერ წარმოდგენილი საქართველოს მთავრობის შემადგენლობისა და „ევროპული სახელმწიფოს მშენებლობისთვის“ სამთავრობო პროგრამისათვის ნდობის გამოცხადების საკითხზე (№07-2/364; 02.02.2024).

საქართველოს პარლამენტის გარემოს დაცვისა და ბუნებრივი რესურსების კომიტეტმა, 2024 წლის 6 თებერვლის სხდომაზე, საქართველოს კონსტიტუციის 56-ე მუხლის მე-2 პუნქტისა და საქართველოს პარლამენტის რეგლამენტის 160-ე მუხლის მე-3 პუნქტის შესაბამისად, განიხილა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარდგენილი საქართველოს მთავრობის შემადგენლობა და თანდართული სამთავრობო პროგრამა „ევროპული სახელმწიფოს მშენებლობისთვის“.

კომიტეტი გაეცნო საქართველოს მთავრობის წევრობის კანდიდატების ბიოგრაფიულ ცნობებს და მოისმინა ინფორმაცია წარმოდგენილი სამთავრობო პროგრამის მიზნებისა და ძირითადი მიმართულებების თაობაზე.

აღნიშნული სამთავრობო პროგრამის ერთ-ერთი ძირითადი მიზანია ქვეყნის სწრაფი ეკონომიკური განვითარების პარალელურად გარემოს დაცვა, მისი მდგრადობის შენარჩუნება და ბუნებრივი რესურსების რაციონალური გამოყენება. ქვეყანაში გარემოს მდგრადობის გასაუმჯობესებლად, საქართველოს მთავრობა განაგრძობს რეფორმებს. კერძოდ, დაგეგმილია თბილისისა და შავი ზღვის ზონისთვის ატმოსფერული ჰაერის ხარისხის მართვის გეგმების დამტკიცება, საქართველოს მთელი ტერიტორიისთვის სხვადასხვა ტიპის ბუნებრივი საფრთხეების რუკების მომზადება შესაბამისად, ადრეული შეტყობინების ეფექტური სისტემის დამონტაჟება და ქვეყნის მასშტაბით მრავლობითი საფრთხეების ადრეული შეტყობინების სისტემების გაუმჯობესება, წყალდიდობების მიმართ განსაკუთრებით მოწყვლად თემებში მოეწყობა ადრეული გაფრთხილების სისტემები, გაგრძელდება ატმოსფერული ჰაერისა და წყლის ხარისხის მონიტორინგისა და შეფასების სისტემების

გაფართოება, გაიზრდება გარემოსდაცვითი შეფასების პროცედურების ეფექტიანობა და ევროკავშირის კანონმდებლობის შესაბამისად, განხორციელდება სამრეწველო ემისიების რეგულირება, გაგრძელდება მერქნულ რესურსზე მოსახლეობის მოთხოვნის დაკმაყოფილება, დაარსდება ახალი დაცული ტერიტორიები და გაფართოვდება ზოგიერთი არსებული, ასევე გაგრძელდება გარემოსდაცვითი განათლების ხელშეწყობისა და გარემოსდაცვითი ცნობიერების ამაღლებისკენ მიმართული ღონისძიებები და ქვეყნის მასშტაბით სპეციფიკური ნარჩენების შეგროვების სეპარირებული სისტემის დანერგვა.

კომიტეტმა მიიჩნია, რომ წარმოდგენილი სამთავრობო პროგრამის ძირითადი მიმართულებების მიხედვით დასახული ამოცანების შესრულება ხელს შეუწყობს პროგრამის მიზნების მიღწევას, მათ შორის გარემოს დაცვას, მისი მდგრადობის შენარჩუნებასა და ბუნებრივი რესურსების რაციონალურ გამოყენებას.

იმავედროულად, კომიტეტმა, მოისმინა და დადებითად შეაფასა საქართველოს მთავრობის წევრობის კანდიდატების ხედვები სამთავრობო პროგრამის შესაბამისად მათი პრიორიტეტების, სამომავლო გეგმებისა და გასატარებელი ღონისძიებების შესახებ.

კომიტეტმა, სხდომაზე დამსწრე წევრთა ხმების უმრავლესობით, მხარი დაუჭირა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისთვის წარდგენილ საქართველოს მთავრობის შემადგენლობასა და სამთავრობო პროგრამას „ევროპული სახელმწიფოს მშენებლობისთვის“.

პატივისცემით,

კომიტეტის თავმჯდომარე
მაია ბითაძე



2-1515/24
07-02-2024

საქართველოს პარლამენტის
საორგანიზაციო დეპარტამენტს

გეგზავნებათ საქართველოს პარლამენტის დარგობრივი ეკონომიკისა და ეკონომიკური პოლიტიკის კომიტეტის დასკვნა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილ საქართველოს მთავრობის შემადგენლობასა და თანდართულ სამთავრობო პროგრამაზე - „ევროპული სახელმწიფოს მშენებლობისთვის“ (№07-2/364; 02.02.2024).

კომიტეტის თავმჯდომარე
დავით სონღულაშვილი



2-1489/24
07-02-2024

საქართველოს პარლამენტის ბიუროს

საქართველოს პარლამენტის

დარგობრივი ეკონომიკისა და ეკონომიკური პოლიტიკის კომიტეტის

დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილ საქართველოს მთავრობის შემადგენლობასა და თანდართულ სამთავრობო პროგრამაზე - „ევროპული სახელმწიფოს მშენებლობისთვის“ (№07-2/364; 02.02.2024).

საქართველოს პარლამენტის დარგობრივი ეკონომიკისა და ეკონომიკური პოლიტიკის კომიტეტმა 2024 წლის 6 თებერვლის სხდომაზე განიხილა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილი საქართველოს მთავრობის შემადგენლობა და თანდართული სამთავრობო პროგრამა - „ევროპული სახელმწიფოს მშენებლობისთვის“ (№07-2/364; 02.02.2024).

კომიტეტმა, სამთავრობო პროგრამის გათვალისწინებით, კენჭისყრის შედეგად, მხარი დაუჭირა საქართველოს მთავრობის წარმოდგენილი შემადგენლობისათვის ნდობის გამოცხადებას.

კომიტეტის თავმჯდომარე
დავით სონღულაშვილი

2-1497/24
07-02-2024


საქართველოს პარლამენტის ბიუროს

დიასპორისა და კავკასიის საკითხთა კომიტეტი, საქართველოს პარლამენტის რეგლამენტის 160-ე მუხლის მე-3 პუნქტის შესაბამისად, გიგზავნით დასკვნას საქართველოს პრემიერ-მინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილი საქართველოს მთავრობის შემადგენლობისა და თანდართული სამთავრობო პროგრამისთვის „ევროპული სახელმწიფოს მშენებლობისთვის“ (07-2/364/10; 02.02.2024) ნდობის გამოცხადების თაობაზე.

დანართი 2 (ორი) ფურცელი

პატივისცემით,

კომიტეტის თავმჯდომარე
ბექა ოდიშარია



საქართველოს პარლამენტის დიასპორისა და კავკასიის საკითხთა კომიტეტის

დასკვნა

საქართველოს პრემიერ-მინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილი საქართველოს მთავრობის შემადგენლობისა და თანდართული სამთავრობო პროგრამისთვის „ევროპული სახელმწიფოს მშენებლობისთვის“ (07-2/364/10; 02.02.2024) ნდობის გამოცხადების თაობაზე.

საქართველოს პარლამენტის დიასპორისა და კავკასიის საკითხთა კომიტეტმა, საქართველოს პარლამენტის რეგლამენტის 160-ე მუხლის მე-3 პუნქტის მოთხოვნის შესაბამისად, მიმდინარე წლის 7 თებერვალს, კომიტეტის სხდომაზე, განიხილა საქართველოს პრემიერ-მინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილი საქართველოს მთავრობის შემადგენლობისა და თანდართული სამთავრობო პროგრამისთვის „ევროპული სახელმწიფოს მშენებლობისთვის“ (07-2/364/10; 02.02.2024) ნდობის გამოცხადების საკითხი.

სხდომაზე წარმოდგენილი იქნა მთავრობის წევრთა კანდიდატურები და სამთავრობო პროგრამა.

საგარეო საქმეთა მინისტრობის კანდიდატმა ილია დარჩიაშვილმა კომიტეტს გააცნო სამთავრობო პროგრამა, მთავრობის სამუშაო გეგმები, პრიორიტეტები, სამომავლო საქმიანობის პრინციპები, მიზნები და ხედვები.


მათ შორის, დეტალურად ისაუბრა საქართველოს საგარეო პოლიტიკის ერთ-ერთ პრიორიტეტზე - ერთიანი, ძლიერი და სამშობლოსთან მჭიდრო კავშირის მქონე დიასპორის ხელშეწყობის საჭიროებაზე. აღნიშნულის განსახორციელებლად აუცილებელია დიასპორასთან ისეთი მდგრადი კავშირის განვითარება, რომელიც თანამემამულეებისათვის სახელმწიფოს შესაძლებლობებზე ფართო წვდომას, საქართველოსათვის კი სახელმწიფო ინტერესების ეფექტიან განხორციელებას უზრუნველყოფს.

წარმოდგენილი პროგრამის მიხედვით, განსაკუთრებული ყურადღება დაეთმობა უცხოეთში მცხოვრები ჩვენი თანამემამულეების პრობლემების გადაჭრას, დიასპორასთან ურთიერთობის სისტემური მიდგომის დანერგვას და დიასპორული ინიციატივების წახალისებას საგრანტო პროგრამების, ასევე, სხვა სახის პროექტების მეშვეობით. სახელმწიფო აქტიურად გააგრძელებს უკვე დანერგილი პროექტების განხორციელებას და მათ გაუმჯობესებას, ახალი პროგრამების შემუშავებას და თანამემამულეებთან დაკავშირებული საკანონმდებლო ბაზის სრულყოფას.

აღსანიშნავია, რომ წარმოდგენილი სამთავრობო პროგრამის მიხედვით მნიშვნელოვან პრიორიტეტად დარჩება **საზღვარგარეთ საქართველოს მოქალაქეებზე ზრუნვა**, მათი უფლებებისა და კანონიერი ინტერესების ეფექტიანი დაცვა.

დიასპორისა და კავკასიის საკითხთა კომიტეტმა, სხდომაზე დამსწრე კომიტეტის წევრთა ხმების უმრავლესობით, ნდობა გამოუცხადა საქართველოს პრემიერ-მინისტრობის კანდიდატის ირაკლი კობახიძის მიერ საქართველოს პარლამენტში წარმოდგენილ საქართველოს მთავრობის შემადგენლობას და თანდართულ სამთავრობო პროგრამას „ევროპული სახელმწიფოს მშენებლობისთვის“ (07-2/364/10; 02.02.2024).

კომიტეტის თავმჯდომარე
ბექა ოდიშარია



2-1516/24
07-02-2024

საქართველოს პარლამენტის ბიუროს

ასლი: საორგანიზაციო დეპარტამენტის
უფროსს ქალბატონ ეთერ სვიანაიძეს

დასკვნა

საქართველოს პრემიერმინისტრობის კანდიდატის მიერ წარმოდგენილი საქართველოს მთავრობის შემადგენლობისა და სამთავრობო პროგრამისთვის ნდობის გამოცხადების თაობაზე (07-2/364; 02.02.2024)

საქართველოს პარლამენტის ევროპასთან ინტეგრაციის კომიტეტმა 2024 წლის 7 თებერვალს განიხილა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილი საქართველოს მთავრობის შემადგენლობა და თანდართული სამთავრობო პროგრამა „ევროპული სახელმწიფოს მშენებლობისთვის“.

განხილვის ფარგლებში კომიტეტმა მოუსმინა საგარეო საქმეთა მინისტრობის კანდიდატს ბატონ ილია დარჩიაშვილს. მინისტრობის კანდიდატმა კომიტეტს გააცნო მთავრობის საგარეო პოლიტიკის ხედვები და პრიორიტეტები.

კომიტეტმა, საქართველოს პარლამენტის რეგლამენტის 160-ე მუხლის მე-3 პუნქტის თანახმად, სხდომაზე დამსწრე კომიტეტის წევრთა ხმების უმრავლესობით მხარი დაუჭირა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილ საქართველოს მთავრობის შემადგენლობას და სამთავრობო პროგრამას.

პატივისცემით,

კომიტეტის თავმჯდომარე
მაკა ბოჭორიშვილი

2-1424/24
06-02-2024

საქართველოს პარლამენტის ბიუროს

დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტისთვის წარდგენილი საქართველოს მთავრობის შემადგენლობისათვის ნდობის გამოცხადების საკითხისა და სამთავრობო პროგრამის „ევროპული სახელმწიფოს მშენებლობისათვის“ თაობაზე. (07-2/364; 02.02.2024)

საქართველოს პარლამენტის თავდაცვისა და უშიშროების კომიტეტმა 2024 წლის 5 თებერვლის სხდომაზე, საქართველოს პარლამენტის რეგლამენტის 160-ე მუხლის მე-3 პუნქტის შესაბამისად, განიხილა საქართველოს პრემიერმინისტრობის კანდიდატის ირაკლი კობახიძის მიერ წარდგენილი სამთავრობო პროგრამა „ევროპული სახელმწიფოს მშენებლობისათვის“ და საქართველოს მთავრობის შემადგენლობისათვის ნდობის გამოცხადების საკითხი.

კომიტეტს მიაჩნია, რომ სამთავრობო პროგრამით წარმოდგენილი ხედვა, განსახორციელებელი გეგმები, ღონისძიებები და ინიციატივები, ძალიან მნიშვნელოვანია, მიმართულია საქართველოს ეროვნული უსაფრთხოების განმტკიცებისაკენ და ემსახურება დემოკრატიული სახელმწიფოს მშენებლობას, ქვეყნის ინტეგრაციას ევროპულ და ევროატლანტიკურ სტრუქტურებში, ქვეყნის სუვერენიტეტის განმტკიცებას, დეოკუპაციასა და ტერიტორიული მთლიანობის აღდგენას, ქვეყნის თავდაცვისუნარიანობის გაძლიერებას, ეკონომიკის სწრაფ განვითარებას, ძლიერი სახელმწიფო ინსტიტუტების ჩამოყალიბებას და თითოეული მოქალაქისათვის სტაბილური და უსაფრთხო გარემოს შექმნას.

კომიტეტი გაეცნო მინისტრობის კანდიდატების ბიოგრაფიულ მონაცემებს და მათ ხედვებს, მოისმინა მინისტრობის კანდიდატების პასუხები კომიტეტის წევრების მიერ

დასმულ შეკითხვებზე და მიაჩნია, რომ მინისტრობის კანდიდატების მიერ სამთავრობო პროგრამით გათვალისწინებული მიზნები და ამოცანები ეფექტიანად იქნება შესრულებული.

კომიტეტმა წარმოდგენილი სამთავრობო პროგრამის გათვალისწინებით, მხარი დაუჭირა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტისთვის წარდგენილი საქართველოს მთავრობის შემადგენლობისათვის ნდობის გამოცხადების საკითხს.

პატივისცემით,

კომიტეტის თავმჯდომარე
ირაკლი ბერაია



2-1440/24
06-02-2024

საქართველოს პარლამენტის ბიუროს

იურიდიულ საკითხთა კომიტეტის
დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტისთვის წარდგენილი საქართველოს მთავრობის შემადგენლობისთვის ნდობის გამოცხადების საკითხისა და სამთავრობო პროგრამის „ევროპული სახელმწიფოს მშენებლობისთვის“ შესახებ (N07-2/364; 02.02.2024)

საქართველოს პარლამენტის იურიდიულ საკითხთა კომიტეტმა 2024 წლის 5 თებერვლის სხდომაზე, საქართველოს პარლამენტის რეგლამენტის 160-ე მუხლის შესაბამისად, დარგობრივი სპეციალიზაციის მიხედვით, განიხილა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტისთვის წარდგენილი საქართველოს მთავრობის შემადგენლობისთვის ნდობის გამოცხადების საკითხი და სამთავრობო პროგრამა „ევროპული სახელმწიფოს მშენებლობისთვის“ (N07-2/364; 02.02.2024).

I. სამთავრობო პროგრამის მოკლე მიმოხილვა

სამთავრობო პროგრამა ეფუძნება დემოკრატიულ ღირებულებებსა და იმ ძირითად პრინციპებს, რომლებიც თავისუფალი, უსაფრთხო და ეკონომიკურად ძლიერი სახელმწიფოს მშენებლობას ემსახურება, სადაც მთავარი მიზანი საქართველოს ყოველი მოქალაქის კეთილდღეობაა.

2023 წლის 14 დეკემბერს საქართველოსთვის ევროკავშირის წევრობის კანდიდატის სტატუსის მინიჭებით საქართველოს ევროინტეგრაციის პროცესი ახალ, ისტორიულ ეტაპზე გადავიდა. ამ პროცესში კი სახელმწიფო ხელისუფლების თითოეული ნაბიჯი მიმართულია საქართველოს ევროპულ და ევროატლანტიკურ სტრუქტურებში გაწევრების შესახებ საქართველოს კონსტიტუციით განმტკიცებული მიზნის შესრულებისაკენ.

ბოლო წლებში გაზრდილი გლობალური და რეგიონალური გამოწვევების ფონზე საქართველოს მთავრობის უცვლელ პრიორიტეტად რჩება საქართველოს სტაბილურობა და უსაფრთხოება, თითოეული ოჯახის დაცულობა, საქართველოს სუვერენიტეტის განმტკიცება, მისი ტერიტორიული მთლიანობის აღდგენა და რუსეთ-საქართველოს კონფლიქტის მშვიდობიანი გზით მოგვარება.

ამრიგად, სამთავრობო პროგრამის მიზანია ქვეყნის ეკონომიკის მეტი სტიმულირება, საქართველოს ყოველი მოქალაქისთვის სტაბილური და უსაფრთხო გარემოს შენარჩუნება, დემოკრატიული ინსტიტუტების კიდევ უფრო გაძლიერება და საქართველოს ევროკავშირში გაწევრებისთვის საჭირო შემდგომი ქმედითი ნაბიჯების გადადგმა.

სამთავრობო პროგრამაში ყურადღება გამახვილებულია საზოგადოების უსაფრთხოებისა და მართლწესრიგის დაცვის საკითხებზე. ამ მხრივ სამთავრობო პროგრამაში აღნიშნულია, რომ გაგრძელდება უსაფრთხოებისა და მართლწესრიგის დაცვის სფეროში რეფორმებისა და ამ სფეროში საქმიანობის ხარისხის ამაღლებაზე ორიენტირებული ღონისძიებების გატარება. სამთავრობო პროგრამაში ასახული ინფორმაციის თანახმად:

- გაგრძელდება საქართველოს შინაგან საქმეთა სამინისტროს შემდგომი განვითარება, რაც გულისხმობს როგორც სტრუქტურულ და ფუნქციურ ცვლილებებს, ისე საკანონმდებლო ინიციატივების შემუშავებას, აგრეთვე საერთაშორისო საპოლიციო ორგანოებთან თანამშრომლობის კიდევ უფრო გაღრმავებას.
- ბუნებრივი კატასტროფების თავიდან აცილების, მათ მიმართ მზადყოფნისა და მათზე ეფექტიანი რეაგირების თვალსაზრისით გაგრძელდება სათანადო მექანიზმების გაძლიერება და საუკეთესო პრაქტიკის დანერგვა.
- გაგრძელდება საგამოძიებო კომპონენტის გაძლიერება და დანაშაულის გამოძიების ხარისხის გაუმჯობესების მიმართულებით ღონისძიებების გატარება.
- გაგრძელდება ქმედითი ნაბიჯების გადადგმა არასრულწლოვანის მიერ და მის მიმართ ჩადენილი დანაშაულის ეფექტიანი გამოძიების, ამ მხრივ არასრულწლოვანის მიმართ სპეციალური მიდგომების დანერგვისა და არასრულწლოვანისთვის სათანადო გარემოს უზრუნველყოფის მიმართულებებით.
- პრიორიტეტად რჩება აქტიური ბრძოლა ორგანიზებულ დანაშაულსა და ნარკოტიკულ დანაშაულთან.
- კიბერდანაშაულის გლობალურად მზარდი ტენდენციების გათვალისწინებით განსაკუთრებული ყურადღება დაეთმობა კიბერდანაშაულის გამოძიების საკითხებს.
- უვიზო მიმოსვლასთან დაკავშირებული გამოწვევების საპასუხოდ გაძლიერდება მიგრაციული ნაკადებისა და საქართველოს სახელმწიფო საზღვრის ეფექტიანი მართვა, რეადმისიის ხელშეკრულების აღსრულება.

- გაგრძელება საგზაო უსაფრთხოების უზრუნველყოფის მიმართულებით სათანადო ღონისძიებების გატარება.

სამთავრობო პროგრამაში აღნიშნულია, რომ გაგრძელება პენიტენციური სისტემის განვითარებისა და მსჯავრდებულთა და ყოფილ პატიმართა რეაბილიტაციისა და რესოციალიზაციის ეფექტიანობის ამაღლების მიმართულებით ღონისძიებების გატარება, სახელმწიფო სერვისების განვითარება, უძრავი ქონების საკუთრების უფლების დაცვის სფეროში სათანადო ღონისძიებების გატარება, მათ შორის, მიწის ნაკვეთებზე უფლებათა სისტემური რეგისტრაციის რეფორმის ფარგლებში.

სამთავრობო პროგრამის თანახმად, გაგრძელება უსაფრთხოებისა და თავდაცვის სფეროში ევროკავშირთან აქტიური თანამშრომლობა; გაგრძელება აქტიური მუშაობა საქართველოს ოკუპირებული ტერიტორიების დეოკუპაციის მიმართულებით, რაც გულისხმობს ევროკავშირის შუამავლობით, 2008 წლის 12 აგვისტოს დადებული ცეცხლის შეწყვეტის შეთანხმების სრულად შესრულების მიზნით, შემდგომი ქმედითი ნაბიჯების გადადგმას; საქართველო განაგრძობს ნატოსთან აქტიურ თანამშრომლობას; გაგრძელება ინტენსიური მუშაობა საქართველოს მთავარ სტრატეგიულ პარტნიორთან – ამერიკის შეერთებულ შტატებთან სტრატეგიული თანამშრომლობის შემდგომი გაღრმავების უზრუნველყოფის მიზნით; გაგრძელება სხვადასხვა ნაბიჯის გადადგმა საქართველოს თავდაცვის ძალების შემდგომი გაძლიერებისა და განვითარების მიმართულებით.

სამთავრობო პროგრამა ითვალისწინებს აგრეთვე სამოქალაქო თანასწორობისა და ინტეგრაციის სახელმწიფო პოლიტიკის ეფექტიანი განხორციელების საკითხებს. საქართველოს კულტურულად მრავალფეროვანი საზოგადოების შემდგომი განმტკიცებისა და სამოქალაქო ინტეგრაციის ხელშეწყობის მიზნით გაგრძელება მუშაობა საქართველოს სახელმწიფო ენის ცოდნის დონის ამაღლების საკითხებზე. გაგრძელება მუშაობა სახელმწიფო სერვისებსა და პროგრამებზე ეთნიკური უმცირესობების ხელმისაწვდომობის მიმართულებით და ეთნიკური უმცირესობების უფლებათა დაცვის ხელშეწყობის სხვადასხვა საკითხზე. კვლავ ყურადღების საგნად რჩება საზღვარგარეთ საქართველოს დიასპორა.

II. კომიტეტის შეფასება

იურიდიულ საკითხთა კომიტეტი დადებითად აფასებს წარმოდგენილ მთავრობის შემადგენლობასა და სამთავრობო პროგრამას. კომიტეტს მიაჩნია, რომ სამთავრობო პროგრამა ემსახურება დემოკრატიული სახელმწიფოს მშენებლობის, ადამიანის ძირითადი უფლებების დაცვის გაუმჯობესების, ქვეყნის შემდგომი ეკონომიკური განვითარების, სახელმწიფო ინსტიტუტების გაძლიერების, ტერიტორიული მთლიანობის აღდგენისა და ქვეყნის

დეოკუპაციისთვის შემდგომი ქმედითი ნაბიჯების გადადგმის, საქართველოს ევროპულ და ევროატლანტიკურ სივრცეში სრული ინტეგრაციის მიზნებს.

კომიტეტი გაეცნო ასევე მთავრობის წევრობის შესაბამის კანდიდატთა ხედვებს და მიიჩნია, რომ ისინი ჯეროვნად შეასრულებენ სამთავრობო პროგრამით განსაზღვრულ ამოცანებს.

ამრიგად, იურიდიულ საკითხთა კომიტეტი წარმოდგენილი სამთავრობო პროგრამის გათვალისწინებით მხარს უჭერს საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტისთვის წარდგენილი საქართველოს მთავრობის შემადგენლობისთვის ნდობის გამოცხადების საკითხს (N07-2/364; 02.02.2024).

პატივისცემით,

კომიტეტის თავმჯდომარე
ანრი ოხანაშვილი





2-1432/24
06-02-2024

საქართველოს პარლამენტის ბიუროს

კულტურის კომიტეტის დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისთვის წარმოდგენილ საქართველოს მთავრობის შემადგენლობასა და თანდართული სამთავრობო პროგრამის „ევროპული სახელმწიფოს მშენებლობისთვის“ (№07-2/364; 02.02.24) შესახებ.

საქართველოს პარლამენტის კულტურის კომიტეტმა მიმდინარე წლის 5 თებერვლის სხდომაზე, საქართველოს პარლამენტის რეგლამენტის 160-ე მუხლის შესაბამისად, დარგობრივი სპეციალიზაციის მიხედვით, განიხილა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში წარმოდგენილი საქართველოს მთავრობის შემადგენლობისთვის ნდობის გამოცხადების საკითხი და სამთავრობო პროგრამა „ევროპული სახელმწიფოს მშენებლობისთვის“ (07-2/364; 02.02.2024).

წინამდებარე სამთავრობო პროგრამის მიზანია ეკონომიკის მეტად სტიმულირება, თითოეული მოქალაქისათვის სტაბილური და უსაფრთხო გარემოს შენარჩუნება, დემოკრატიული ინსტიტუციების გაძლიერება და საქართველოს ევროკავშირში გაწევრებისთვის საჭირო ქმედითი ნაბიჯების გადადგმა. წარმოდგენილ დოკუმენტში ყურადღება გამახვილებულია ისეთ მნიშველოვან საკითხებზე, როგორებიცაა: საგარეო პოლიტიკა, უსაფრთხოება, კონფლიქტის მოგვარება და ადამიანის უფლებები, ეკონომიკური განვითარება, სოციალური პოლიტიკა და ადამიანური კაპიტალის განვითარება, აგრეთვე სახელმწიფო მმართველობა.

სამთავრობო პროგრამა ქმნის მყარ საფუძვლებს ქვეყნის სწრაფი განვითარებისთვის, როგორც ეროვნული, ასევე რეგიონული და გლობალური მასშტაბით, დოკუმენტი ასევე აახლოებს ქვეყანას ევროკავშირში გაწევრიანების ისტორიულ მიზანთან და ემსახურება თითოეული მოქალაქის უკეთეს მომავალს.

ქვეყნის გრძელვადიან და მდგრადი განვითარების კონტექსტში უმნიშვნელოვანესია კულტურული მემკვიდრეობის შენარჩუნების, საზოგადოების კულტურაზე ხელმისაწვდომობის, შემოქმედებითი ინდუსტრიების გაძლიერებისა და ხელოვანის შემოქმედებითი პოტენციალის თვითრეალიზების უზრუნველყოფა. სამთავრობო პროგრამის მიხედვით, კულტურის სფეროს მართვის მოდერნიზაციისა და გაუმჯობესების მიზნით, განხორციელდება ახალი კადრების მოზიდვა და რესურსების მობილიზება. პრიორიტეტული მიმართულებების განსახორციელებლად, დაინერგება ახალი ინიციატივები, ეტაპობრივად მოწესრიგდება მატერიალურ-ტექნიკური ბაზა და ინფრასტრუქტურა. დოკუმენტის მიხედვით დაიხვეწება კულტურის სფეროს მარეგული, მათ შორის კულტურული მემკვიდრეობის (მატერიალური, არამატერიალური, ბუნებრივი მემკვიდრეობა) სფეროში არსებული კანონმდებლობა. კულტურული მემკვიდრეობის კვლევისა და რეაბილიტაციის მიმართულებით დაინერგება თანამედროვე ტექნოლოგიები (სკანირება, 3D მოდელების შექმნა). კულტურული მემკვიდრეობის ძეგლებისა და ობიექტების დაცვის მიზნით განხორციელდება მათი გამოვლენა, შესწავლა, კვლევა, ინვენტარიზაცია და გაგრძელება კულტურული მემკვიდრეობის ძეგლების კონსერვაცია/რეაბილიტაცია.

განსაკუთრებული ყურადღება დაეთმობა სახელოვნებო განათლების მიმართულებით სახელოვნებო საგანმანათლებლო დაწესებულებებში აკადემიური და სამეცნიერო ადამიანური რესურსის გაძლიერებაზე ორიენტირებული პროგრამების შემუშავებას, თანამედროვე ხელოვნების სფეროში ინოვაციური მეთოდებისა და ტექნოლოგიების გამოყენების მხარდაჭერას, ახალგაზრდა ხელოვანების ინიციატივების ხელშეწყობას.

აქტიურად გაგრძელდება კულტურის თანამედროვე ინფრასტრუქტურის მოწყობის, ახალი ტექნოლოგიების გამოყენებისა და კულტურის სექტორის ციფრულ სამყაროში ინტეგრირების ხელშეწყობი ღონისძიებები, რომლებიც კულტურის სექტორის ორგანიზაციების, ხელოვანებისათვის დასაქმებისა და შემოქმედებითი თვითრეალიზების დამატებით შესაძლებლობებს შექმნის.

გაგრძელდება ევროპასთან ინტეგრაციის პროცესი, ამასთანავე განხორციელდება საქართველოსა და მისი კულტურის შესახებ საერთაშორისო საზოგადოების ცნობიერების ამაღლების ხელშეწყობი ღონისძიებები, გაიზრდება საერთაშორისო პროგრამებსა და ღონისძიებებში მონაწილეობის მაჩვენებელი. ხელი შეეწყობა ორმხრივ და მრავალმხრივ ფორმატებში საერთაშორისო კულტურული ურთიერთობების გაღრმავებას, რეგიონების სახელოვნებო ინსტიტუციების, კოლექტივების ქვეყნის ერთიან კულტურულ სივრცეში

ჩართულობასა და საერთაშორისო ასპარეზზე მათ წარმოჩენას. გაიზრდება კულტურის ხელმისაწვდომობა ფართო საზოგადოებისათვის, განსაკუთრებით, რეგიონებში მცხოვრები მოსახლეობისათვის, ეთნიკური უმცირესობების, ქალებისა და შშმ პირებისათვის. ხელი შეეწყობა ეთნიკურ უმცირესობათა კულტურული თვითმყოფადობის შენარჩუნებასა და შშმ პირთა შემოქმედებითი უნარების განვითარებას.

კომიტეტი დადებითად აფასებს წარმოდგენილ სამთავრობო პროგრამას და წარმოდგენილ მთავრობის შემადგენლობას.

ყოველივე ზემოაღნიშნულის გათვალისწინებით, კულტურის კომიტეტმა მხარი დაუჭირა საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისთვის წარმოდგენილ საქართველოს მთავრობის შემადგენლობასა და თანდართულ სამთავრობო პროგრამას „ევროპული სახელმწიფოს მშენებლობისთვის“ (№07-2/364; 02.02.24).

პატივისცემით,

კომიტეტის თავმჯდომარე
ელისო ბოლქვაძე



2-1443/24
06-02-2024

საქართველოს პარლამენტის ბიუროს

საქართველოს პარლამენტის რეგიონული პოლიტიკისა და
თვითმმართველობის კომიტეტის

დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის მისაღებად წარმოდგენილი საქართველოს მთავრობის შემადგენლობისა და სამთავრობო პროგრამის თაობაზე (№07-2/364; 02.02.2024)

საქართველოს პარლამენტის რეგიონული პოლიტიკისა და თვითმმართველობის კომიტეტმა, საქართველოს პარლამენტის 160-ე მუხლის მე-3 პუნქტის შესაბამისად, 2024 წლის 6 თებერვალს კომიტეტის სხდომაზე განიხილა სამთავრობო პროგრამა „ევროპული სახელმწიფოს მშენებლობისთვის“ და საქართველოს მთავრობის შემადგენლობისათვის ნდობის გამოცხადების საკითხი.

კომიტეტმა სხდომაზე დამსწრე წევრთა ხმების უმრავლესობით, მხარი დაუჭირა საქართველოს პრემიერმინისტრობის კანდიდატის მიერ წარმოდგენილ საქართველოს მთავრობის შემადგენლობასა და სამთავრობო პროგრამისთვის ნდობის გამოცხადების საკითხს.

პატივისცემით,

კომიტეტის თავმჯდომარე
კახა კახიშვილი



2-1487/24
07-02-2024

საქართველოს პარლამენტის ბიუროს

დასკვნა

საქართველოს პრემიერმინისტრობის კანდიდატის ირაკლი კობახიძის მიერ ნდობის
გამოცხადებისათვის წარმოგენილ საქართველოს მთავრობის შემადგენლობასა და
სამთავრობო პროგრამაზე „ევროპული სახელმწიფოს მშენებლობისთვის“
(07-2/364; 02.02.2024)

საგარეო ურთიერთობათა კომიტეტმა განიხილა საქართველოს პრემიერმინისტრობის
კანდიდატის ირაკლი კობახიძის მიერ ნდობის გამოცხადებისათვის წარმოგენილი
საქართველოს მთავრობის შემადგენლობა და სამთავრობო პროგრამა „ევროპული
სახელმწიფოს მშენებლობისთვის“ და მხარი დაუჭირა მათ.

პატივისცემით,

კომიტეტის თავმჯდომარის პირველი მოადგილე
მარიამ ლაშვი

2-1353/24
05-02-2024

საქართველოს პარლამენტის ბიუროს

საქართველოს პარლამენტის საპროცედურო

საკითხთა და წესების კომიტეტის

დასკვნა

საქართველოს პარლამენტის საპროცედურო საკითხთა და წესების კომიტეტმა, საქართველოს პარლამენტის რეგლამენტის 160-ე მუხლის მე-3 პუნქტის შესაბამისად, 2024 წლის 5 თებერვალს, კომიტეტის სხდომაზე განიხილა საქართველოს მთავრობის სამთავრობო პროგრამა და საქართველოს მთავრობის შემადგენლობისათვის ნდობის გამოცხადების საკითხი.

კომიტეტმა სხდომაზე დამსწრე წევრთა ხმების უმრავლესობით, მხარი დაუჭირა საქართველოს პრემიერმინისტრობის კანდიდატის მიერ წარმოდგენილ საქართველოს მთავრობის შემადგენლობისთვის ნდობის გამოცხადების საკითხს.

პატივისცემით,

კომიტეტის თავმჯდომარე
ირაკლი ქადაგიშვილი



2-1463/24
07-02-2024

საქართველოს პარლამენტის
საორგანიზაციო დეპარტამენტის უფროსს
ქალბატონ ეთერ სვიანაიძეს

ქალბატონო ეთერ,

გიგზავნით საფინანსო-საბიუჯეტო კომიტეტის დასკვნას საქართველოს კონსტიტუციის 56-ე მუხლის მე-2 პუნქტის შესაბამისად, საქართველოს პრემიერ-მინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილ საქართველოს მთავრობის შემადგენლობასა და თანდართულ სამთავრობო პროგრამაზე „ევროპული სახელმწიფოს მშენებლობისთვის“ (07-2/364; 02.02.2024).

დანართი: 1 ფურცელი.

პატივისცემით,

კომიტეტის თავმჯდომარე
პაატა კვიციანიძე



2-1459/24
07-02-2024

საქართველოს პარლამენტის ბიუროს

დასკვნა

საქართველოს პარლამენტის საფინანსო-საბიუჯეტო კომიტეტმა 2024 წლის 6 თებერვალს კომიტეტის სხდომაზე განიხილა საქართველოს კონსტიტუციის 56-ე მუხლის მე-2 პუნქტის შესაბამისად, საქართველოს პრემიერ-მინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილი საქართველოს მთავრობის შემადგენლობა და თანდართული სამთავრობო პროგრამა „ევროპული სახელმწიფოს მშენებლობისთვის“ (07-2/364; 02.02.2024).

ეკონომიკური პროფილის მინისტრებისა და სამთავრობო პროგრამის განხილვის შემდეგ, საქართველოს პარლამენტის რეგლამენტის 160-ე მუხლის მე-3 პუნქტის მოთხოვნათა გათვალისწინებით, ჩატარებული კენჭისყრის შედეგებიდან გამომდინარე, საფინანსო-საბიუჯეტო კომიტეტმა მხარი დაუჭირა მთავრობის შემადგენლობისთვის ნდობის გამოცხადების საკითხს.

პატივისცემით,

კომიტეტის თავმჯდომარე
პაატა კვიციანიძე



2-1392/24
06-02-2024

საქართველოს პარლამენტის ბიუროს

დასკვნა

საქართველოს პრემიერმინისტრობის კანდიდატის ირაკლი კობახიძის მიერ წარმოდგენილ საქართველოს მთავრობის შემადგენლობასა და სამთავრობო პროგრამის - „ევროპული სახელმწიფოს მშენებლობისთვის“ ნდობის გამოცხადების თაობაზე (№07-2/364; 02.02.2024)

საქართველოს პარლამენტის სპორტის კომიტეტმა 2024 წლის 5 თებერვალს კომიტეტის სხდომაზე განიხილა საქართველოს პრემიერმინისტრობის კანდიდატის ირაკლი კობახიძის მიერ წარმოდგენილი საქართველოს მთავრობის შემადგენლობისა და სამთავრობო პროგრამის - „ევროპული სახელმწიფოს მშენებლობისთვის“ ნდობის გამოცხადების საკითხი.

წარმოდგენილი სამთავრობო პროგრამის მიხედვით მნიშვნელოვნად გაიზარდა და მომავალშიც ეტაპობრივად გაიზრდება სახელმწიფოს მხრიდან მასობრივი და მაღალი მიღწევების სპორტის დაფინანსება.

პროფესიული სპორტის განვითარების მიზნით, გაგრძელდება ქვეყნის ნაკრები გუნდების მზადება და მონაწილეობა საერთაშორისო სპორტულ ღონისძიებებში, სასწავლო-საწვრთნელი შეკრებების მოწყობა, საქართველოს ჩემპიონატებისა და პირველობების ჩატარება, სპორტის სახეობების პოპულარიზაცია და სპორტის ეროვნული სახეობების განვითარების ხელშეწყობა.

გაგრძელდება სპორტის სხვადასხვა სახეობაში საერთაშორისო ჩემპიონატების/ტურნირების საქართველოში მასპინძლობის აქტიური მხარდაჭერა: საქართველო უმასპინძლებს ისეთ მნიშვნელოვან საერთაშორისო სპორტულ ღონისძიებებს, როგორებიცაა: 2024 წელს - კადეტთა, იუნიორთა და 21 წლამდელთა ევროპის ჩემპიონატი კარატეში; ჭადრაკში ქალთა შორის მსოფლიო ჩემპიონატი - გრან-პრის ეტაპი; 2025 წელს - ევროპის ახალგაზრდული ზამთრის ოლიმპიური ფესტივალი - „ბაკურიანი 2025“; ფარიკაობის მსოფლიოს ჩემპიონატი; ქალთა შორის მსოფლიო თასი ჭადრაკში.

გაგრძელდება დამსახურებული სპორტის მუშაკებისა და ვეტერანი სპორტსმენების, მაღალმთიან დასახლებებში სპორტის სფეროში დასაქმებული მწვრთნელების სოციალური მხარდაჭერის პროგრამების, ასევე ოლიმპიური ჩემპიონების, პერსპექტიული და

საერთაშორისო ასპარეზზე გამარჯვებული სპორტსმენების, სამწვრთნელო და სამედიცინო პერსონალის მხარდაჭერის ღონისძიებები.

ასევე, გაგრძელდება ქვეყანაში მასობრივი და მაღალი მიღწევების სპორტის მხარდაჭერა, მათ შორის, ეროვნული სპორტული ორგანიზაციებისა და რეგიონების შესაბამისი ინვენტარიტა და ეკიპირებით უზრუნველყოფის გზით.

გაგრძელდება მნიშვნელოვანი სპორტული ობიექტების მშენებლობა და რეაბილიტაცია.

კომიტეტმა მხარი დაუჭირა საქართველოს პრემიერ-მინისტრობის კანდიდატის მიერ წარმოდგენილ სამთავრობო პროგრამას და საქართველოს მთავრობის შემადგენლობისათვის ნდობის გამოცხადებას.

პატივისცემით,

კომიტეტის თავმჯდომარე
ირაკლი მექმარიაშვილი



2-1408/24
06-02-2024

საქართველოს პარლამენტის ბიუროს

დასკვნა

საქართველოს პრემიერმინისტრობის კანდიდატის ირაკლი კობახიძის მიერ საქართველოს პარლამენტში ნდობის გამოცხადებისათვის წარმოდგენილი საქართველოს მთავრობის შემადგენლობისა და თანდართული სამთავრობო პროგრამის „ევროპული სახელმწიფოს მშენებლობისთვის“ (N07-2/364; 02.02.2024) თაობაზე

ჯანმრთელობის დაცვისა და სოციალურ საკითხთა კომიტეტმა 2024 წლის 5 თებერვალს სხდომაზე განიხილა საქართველოს პარლამენტის რეგლამენტის 160-ე მუხლის მე-3 პუნქტის შესაბამისად, საქართველოს პარლამენტში ნდობის მისაღებად წარმოდგენილი საქართველოს მთავრობის შემადგენლობა და თანდართული სამთავრობო პროგრამა.

კომიტეტმა მხარი დაუჭირა წარმოდგენილ საქართველოს მთავრობის შემადგენლობას და სამთავრობო პროგრამას.

პატივისცემით,

კომიტეტის თავმჯდომარე
ზაზა ლომინაძე